

ԱՂՕԹՔ՝ ԵԿԵՂԵՑԻՆԵՐՈՒ ՄԻՈՒԹԵԱՆ ՀԱՄԱՐ

«Ձեզի կ'աղաչեմ, եղբայրներ, մեր Տէր Յիսուս Քրիստոսին անունովը, որ միեւնոյն խօսքը ունենաք ամենքդ ու երկպառակութիւններ չըլլան ձեր մէջ. հապա դուք մէկ մտքի ու մէկ խորհուրդի վրայ հաստատուած ըլլաք»: (Ա. Կորնթ.1:10)

Նախագահութեամբ Հայ Երեք Համայնքապետերու՝ Բերիոյ Հայոց Թեմի Առաջնորդ Գերշ. Տ. Շահան Սրբ. Եպս. Սարգիսեանի, Հայ Կաթողիկէ Առաջնորդ Արհի. Տ. Պետրոս Արք. Միրիաթեանի եւ Հայ Աւետարանական Եկեղեցիի Համայնքապետ Վեր. Յարութիւն Սելիմեանի, Կիրակի, 27 Յունուար 2013-ի յետմիջօրէին ժամը՝ 4-ին տեղի ունեցաւ «Աղօթք եկեղեցիներու միութեան համար» Հայ Առաքելական Ս. Աստուածածին եկեղեցիին մէջ:



Պաշտամունքի սկիզբը տեղի ունեցաւ երեկոյեան ժամերգութիւն մասնակցութեամբ հոգեւորական դասուն: Ժամերգութեան աւարտին փոխասաց աղօթքներով ժողովուրդ եւ հոգեւորականներ աղերսանքներով օրհնութիւն ընծայեցին հօր Աստուծոյ, որ մեզ միացուց աղօթքի մէջ, ինչպէս նաեւ թողութիւն հայցեցին Յիսուս Քրիստոսէն քրիստոնէական միութեան դէմ գործած մեղքերուն համար եւ վերջապէս խնդրանք մատուցին Ս. Հոգիին, որ մեր այս աղաչանքները մատուցանէ հօր Աստուծոյ: Փոխասացութիւններու ընդմէջէն պատգամներ փոխանցեցին Հայ Երեք Համայնքապետերը:

Արհիապատիւ Տ. Պետրոս Արք. Միրիաթեան իր պատգամը սկսաւ այս տարուայ Միութեան

Շաբթուայ բնաբանով՝ «Ու Տէրը քեզմէ ինչ կը պահանջէ իրաւունք ընել, ողորմութիւն սիրել, ու խոնարհութիւնով քու Աստուծոյդ հետ քալել» (Միքիա 6:8): Արհիապատիւ տէրը երեք զաղափարներ յայտնեց, ըլլայ արդար, ողորմութիւն կատարել եւ Աստուծոյ կամքին համաձայն ապրիլ: Գերապայծառ հայրը իր խօսքին աւարտին ըսաւ. «Այսօր Աստուած մեզ կը կանչէ մտքով ու սրտով իրարու հետ ըլլալու, եթէ հեռանանք իրմէ կը սկարանանք... այսօր ժամանակն է զգաստութեամբ ու խոնարհութեամբ յանձնուիլ Աստուծոյ փառքին»:

Օրուան երկրորդ պատգամաբերն էր Վեր. Յարութիւն Սելիմեան. ան բնաբան ունենալով Պօղոս առաքեալի խօսքերը. «Ուստի կ'աղաչեմ, որ դուք այնպէս քալէք ինչպէս կը վայելէ այս կոչումին, որով կանչուեցաք բոլոր խոնարհութիւնով ու հեզութիւնով, երկայնամտութեամբ, սիրով իրարու ներողամիտ ըլլալով, ջանալով հոգւոյն Սրբոյ միաբանութիւնը խաղաղութեան կապ պահելով» (Եփեսացիս 4:1-3): Վերապատուելին ընդգծեց իր խօսքը, թէ՛ Պօղոս առաքեալ մարդկային բնութեան օրինակը կ'օգտագործէ քրիստոնէական միաբանութիւնը նկարագրելու ջանքին մէջ, յիշելով, թէ՛ իւրաքանչիւր անդամ մարմնի վրայ կը տարբերի իր ձեւին եւ պաշտօնին մէջ միւս անդամներէ: Բայց եւ այնպէս բոլորին մէկտեղումով կը կազմուի մարմինը եւ կ'երաշխաւորուի միասնական հաւաքական աշխատանքը: Ան ըսաւ. «Եթէ երբեք պիտի պահպանենք հոգիին միութիւնը, պէտք է ապահովուած ըլլանք անհրաժեշտ վերելի յիշուած քրիստոնէական եօթը շնորհքները: Այս յիշեալ քրիստոնէական շնորհքներու բացակայութեան բերումով մարդը կը մնայ դատապարտուած առանձնութիւն եւ իր շրջապատին հետ պատերազմի մէջ: Բազմաթիւ փորձեր կատարուած են եւ կը կատարուին, որ եկեղեցիներ եւ քրիստոնէաներ ըլլան միաբան իրենց զիրենք ներկայացնելու ձեւին եւ վիճակին: Աստուծոյ խօսքը կու գայ ըսելու, թէ՛ այս ձեւական միասնականութիւնը աժան միութիւն կը յառաջացնէ, որը հիմնուած չէ քրիստոնէական վարդապետութիւններու եւ սկզբունքներու վրայ»: Ան իր խօսքը փակեց հետեւեալ խօսքով՝ «Ճշմարիտ միութիւնը եւ միաբանութիւնը կը ծնի երբ միաբանութիւնը երաշխաւորող Աստուածային շնորհքները կը սրուին եւ կը զարգանան եկեղեցիին մէջ»:



Ապա եզրափակիչ խօսքով իր պատգամը փոխանցեց Գերշ. Տ. Շահան Սրբ. Եպս. Սարգիսեան՝ բնաբան ունենալով (Յով. 14:23-31) անետարանի համարները, մեկնաբանեց ու հիմնադրեց իր խօսքերը հետեւեալ ճշմարտութիւններու վրայ. 1.- Յիսուս՝ գերագոյն քահանայապետը կը խոստանայ լուսաւորել իր առաքեալները Աստուածային խորհուրդներուն մասին 2.- Յիսուս կը խոստանայ Ս. Երրորդութեան բնակչութիւնը ճշմարիտ հաւատացեալի հոգւոյն մէջ, որ պիտի դառնայ օթեան ամենասուրբ երրորդութեան 3.- Քրիստոսի հիմնած եկեղեցին դարերու ընթացքին կը մնայ անսասան, անսխալ իր վարդապետութիւններով ու հաւատալիքներով 4.- Յիսուս իր խաղաղութիւնը կու տայ աշակերտներուն, խաղաղութիւն՝ որ կը նշանակէ հաշտութիւն Աստուծոյ հետ, հաշտութիւն ընկերոջ հետ, վստահութիւն Աստուծոյ վրայ եւ քաջութիւն թշնամիներուն դէմ:



Երեք Համայնքապետերու փոխանցուած պատգամները կը ներփակեն խաղաղութեան աղերսում Սուրիական հայրենիքի տագնապալի ու դժուարին օրերուն մէջ:

Միութեան աղօթքի երեկոն իր աւարտին հասաւ «Պահպանիչ» աղօթքով ու խաղաղութեան ողջոյնի օրհնութեամբ: